

江蘇省立蘇州圖書館  
吳中文獻小叢書之廿五

蘭舫筆記

## 刊行吳中文獻小叢書旨趣

地方文獻，全文化之所由積也。文化爲物，羣倫攸共，故凡尊惜文化，應自地方文獻始。吾吳夙稱東南文藪，文獻著錄，與祺俱進，或既鉛槧，或祕篋衍。經茲兵燹，散佚難稽，歷劫幸存，彌足珍貴。本館徵拾叢殘，職責莫貸，爰擬就有關地方文獻之亟待表章者，如先儒專著，寓賢環紀，或其遺稿未經刊布，或雖刊刻而流傳已尠，特輯爲吳中文獻小叢書，次第梓行。孔氏有言「文獻不足故也，足則吾能徵之矣」，謹以竢諸來者之徵。體制苟簡，尙鑒微志。

## 原序

聖經云。致知在格物。又云。物格而后知至。則是開心思。廣耳目。格物要矣。余自慚固陋。不克登大雅之堂。夙歎蒐羅未得。擴靈虛之府。溯風雨之十年。嘆榛莽於章句。泊乎入仕。執掌簿書。凡所遇名山大川。與大人先生之論說。百忙中亦不能領略一二。顧我碌碌。轉眼已四十無聞矣。顧或偶爾留心。何暇載筆。惟是因公命棹。無計消閒。時而梅雨推篷。時而蘆花淺泊。雖不比旗亭賭酒。爭畫雙環。或亦效牛渚吟詩。陶情一葉。爰以濡墨焚香。搜諸耳目。取夫有關風俗。有切物理者。並夫神仙鬼異之事。一一筆而記之。曰蘭舫筆記。此固不足當博物洽聞者之一盼也。然藏之篋笥。或可爲子弟輩少廣聞見也。云爾。時乾隆己丑秋八月上旬日。丙崖常輝書于婁江舟次。

## 蘭舫筆記

太湖卽五湖。又名笠澤。跨江蘇安徽浙江三省。週圍三萬六千頃。上有七十二山繞之。屬在江之常州府者。有百口通焉。曰百瀆港。最大者名烏溪口。宜荆民患盜賊出沒。欲截塞焉。呈控督撫。時中丞明公。委余查勘。以口有稅關。固織造管也。使受命織造。薩公以事關國課。未便堵截。爲言。余往勘。見商船絡繹。勢不能塞。並見別口皆木椿零落。遂具詳修葺。而于烏溪請設把總駐防焉。而宜荆民實未能除害也。

江省盜案。有所謂抽幫者。此輩多出浙之湖州府。駕一卷棚船。快如飛鳥。每船前后止二人。實則五六人也。藏艙內。更迭出之。並藏碎磚石。及刀劍兇器。鮮明非常。實木爲之。而以銀箔貼者。其船出沒太湖無定所。以扒羅斯爲名。客船過則尾之。至村鎮。卽泊客船左右。伺夜熟睡。暗以長繩繫客船梢。解其纜。撐已船而客船隨矣。覺之則斷繩以逸。追則亂石交下。且擊且走。不然。撐至荒遠浩渺處。舉火執兵。過船行劫。惟取銀錢。他物不顧也。縱捕之官。亦無真賊。故十案不破二三焉。

金匱令某。好稱能事。一日帶家丁三四輩。扮客商裝。囊金二百。乘小舟于湖口。以抽幫案積不獲。欲身試而親緝也。出之次日夜。合船忽睡。夢中聞叱咤聲。及開眼而盜已拆篷入矣。水手讓曰。此金匱官船也。盜傲不顧。刀斧並舉。幸一家丁少通武藝。極力遮被。盜終搜其二數而去。實非金。乃錫也。此公隱而不宣。實僚傳以爲笑。

三江民情狡滑。抽釐之案。假者頗多。其故。買賣地。本主多不親往。或子弟。或夥計。每取于博妓。空囊不能歸。遂謀結船戶。於所經地方。略飾其跡。而以被劫報矣。官雖明。亦莫如之何也。一面差緝。一面備關。移送本籍。是官受其累。而本主被其欺者。屢屢矣。此風俗之儉也。

伍相國潘侯子胥。死爲湖神。廟在太湖邊胥口。余于丁亥代吳縣相屍洞庭西山。泊宿胥口。次早過湖。吏白。凡官員必祭而過。不則風波有警。余曰。以一殂而施恩怨。英雄固不如此。然古賢遺像。何可不拜。遂入廟行禮。見古殿三楹。一像孤坐。柱刻一聯。鞭屍楚墓生前孝。扶目吳門死後忠。院井荒涼。門牆蕭索。略無香火氣。余作二詩云。一祠寥落五湖濱。太息英雄命數屯。扶目當年悲寄子。拋尸往事想孤臣。春潮胥口吳宮水。落日蘇臺廢苑塵。東絕越。西破楚。祇今風雨怨黃昏。又山色湖光白古今。荒祠瞻拜一傷心。潮來徒吊潘侯水。劍賜空嗟越女吟。法象八門曾絕越。行成七殉亦爲禽。高飛白是知機鳥。烏鵲歌殘怨不禁。

西洞庭山。入胥口。行湖面七十餘里。始至山綿亘無極。四圍皆湖。居民畜野。語言少異。終古不知稼穡事。以捕魚種梅爲業。土產楊梅。枇杷。碧羅春茶。此貴而美者。其茶色白。而葉碧綠如豆瓣。香美非常。熟時悉爲大憲購去。士大夫不多得。余因公住宿三日。覽其形勢。有桃源風焉。

金壇縣西南六七里。許有西塋。余曾以勘災行。縣邑侯柯公。邀遊其地。四圍水繞。土山聯絡不絕。竹木蒙

籠內有大池六七區。皆方廣二三十畝者。東南竹徑一條。緣逕出。則桂林約數百本。每本可大十餘圍。時方八月。金粟滿林。芳香襲衣。口鼻盡馥。真吾平生之一大觀也。環而北。邱壑重複。萬樹參天。幹老枝奇。皆似數百年者。行里許。有木坊斜倚顏曰龍山隱居。無年月姓名。書法老古之甚。過坊則荝舍竹籬。偏東草閣三間。後置假山。歷落前面。俯臨大池。主人出。具茶果甚恭。詢其姓本于氏。家貧徙此。實大家子也。問其地爲祖基乎。曰伊祖購之人者龍山之名。亦不知誰何也。

吳中山水固佳。自聖主時巡。悉成靈臺。靈沼矣。吾觀水之秀。無過石湖。山之奇。無過天平。何者。石湖光如練。靜如鏡。潮汐不通。波瀾不驚。余嘗秋夜乘扁舟遊之。真有長煙一空。皓月千里。浮光躍金。靜影沉璧之趣。至天平山。如白雲泉。自空壁之右竇流。汨汨不竭。一奇觀也。一線天。則一山崩裂。長數十步。兩面陟立。中通一人行。仰觀天如一線。二奇觀也。上則石筍林立。不下千數。有橫拖有斜插。有挺直。皆高至數仞。此卽萬笏朝天。三奇觀也。山頂之照湖鏡。石光如洗。太湖之波影畢見。四奇觀也。無異白香山范文正之戀戀矣。

戊子四月。余因事至蘇。風聞市街有剪髮辯者。二日內譁然四起。行人莫不盤其辮于首。不則手挽之。傳言浙之德清造萬魂橋。釘椿不下。有妖僧以髮辯禱之。始下。故懸重價購之。且需一萬。剪之者有迷藥。照行人彈之。便昏仆。及剪以去。人必死。蓋攝其魂也。又聞男男女女衣衿。亦如剪辮狀。余以爲誕妄。不之意也。

及回署。而本邑早哄然矣。余使人往浙訪之。橋本官修。工已竣。無他說也。未一月而傳揚遍諸省。及關東口外如一焉。京師之風。漸入聖聰。溯其源起于江浙。恐惑民心。故特旨督緝。而江省羽檄星馳矣。余曾一日夜。接六百里文四封焉。按江南一省。僧道羅織以萬計。其死于縲絏。刑杖凍餓者亦數百矣。然人人傳其語。而究未覩其實也。經半載。其風乍息。無一語及者。終不解其所以也。

傳有蛤蜊蟲者。能飛食人。人人宅一家皆死。惟畏鵝。人爭購焉。一鵝價至數金。且有圖形符以斃蟲。人皆抄買貼門牆。余亦聞之而未見也。此即織剪辮而起者。民之易惑何如。

剪辮一案。江省官署誤頗多。寅僚惶惶。查拿無虛日。余心知其誕。順應而已。一夜忽有差員叫城而入。坐外堂。急叩宅門。家人連報。余以爲揭參摘印而已。徐整衣出。啓門延人問曰。公何來。員曰。明公禍且至矣。請屏左右。出府文一角。拆視之。提剪辮犯也。事起寶山縣丞馬。獲一遊僧文秀。供自浙入奉。投宿老觀音堂。主僧文德。先住蘇州道上四人。姓乃王黃汪張也。收買髮辮。令伊剪來給值。伊于邑之南橋鎮。剪二條。某月日也。持交之。得錢三百。復令剪之。仍于是鎮剪三條。及持送。文德曰。道士去矣。異日來收。伊將三辮藏金邑之斗母宮觀音座下。可起證也。該丞據供通詳。而織造府薩。已訪聞拜奏矣。院司飛調本府。此府憲馳省路發也。余曰。果爾。余罪遣無地矣。但事近懸虛。請先提文德可也。刻于城內查之初。無是庵是僧。天未曉。而叫城者又屢屢矣。余出城會之。則撫按差員四人。皆素識者。向余立案。文德聲色俱厲。余曰。公

等毋急。某罪自當耳。且文德非可取懷予者。四員少緩。余卽邑地分四路。每員各緝一路。分遣能事頭役從之。余卽循環查拿。約以明午仍會齊城下。至期會一無影響。而差員皆馳回繳命矣。余二日夜止一飯。陸續接羽檄十封。悉此事。而語幾唾罵矣。余終知爲子虛事。心益定。但急欲得文德一質耳。忽憶曰。可得矣。取監牌吊賊某問話。須臾至。問曰。爾知縣地有老觀音堂乎。曰然。有之。在莊鎮半里許也。問僧何名。曰濟遠德緣。二僧外無人也。又問邑有僧名文德者乎。曰小人乞食二十年。作竊二十年。一廟一僧。莫不識也。無所謂文德者。還其禁。差人飛馳去。夜將半。拘到矣。問其庵名法名。如賊言。及詢四道上。並文秀之名。則懵然不解也。余告以故。賞給路費。親押赴蘇。比至而案已銷矣。惟俟撫軍覆奏耳。釋二僧歸。謁諸上憲。皆霽色。後謁蘇府申公公。迎笑曰。常公惡夢醒矣。急請其故。公歷告之。先是太倉牧貴。親提文秀來蘇。司院過審數次。無異供。且迫于織造一摺。故拜奏焉。公謁司。語及之。公曰。此案某甚疑。且關欽件。未可遽定。請發敝府一訊。觀察吳公曰。善。遂將犯卷並發。公坐書齋。屏吏役。取供卷一覽。先授計一家人。後帶文秀至。見其衣履甚整。公曰。爾一遊方僧。何得如此衣履。是馬老爺給乎。僧曰。非也。貴太爺給耳。公賜之茶果。且食且問。與原詞無少異。頃之。快頭二人鎖押四道士至。公厲聲罵曰。該死狗頭。逃匿何處。可知天網恢恢矣。迴顧文秀曰。爾識此四人乎。秀曰。此卽住奉收辦者也。因歷指其姓。四人各爭之。文秀執益堅。公曰。爾毋陷好人。秀曰。僧與相處多日。實不誣也。公令四人起去其裝。而文秀愕然矣。公曰。此吾之書吏也。爾

以爲道士乎。蓋公照其原供之年貌服色而扮之者。文秀瞪目無語。色如死灰。惟叩頭耳。公曰。吾將解爾刑部治罪矣。如實言。吾救汝。秀曰。此馬公日夜拷掠逼吾言者。皆無有事也。至太倉州太爺。囑以毋得改供。故賜之衣被。小人該死。公于是詣司院。乞銷案覆奏焉。公諱夢龍。山西人。任廣西按察使。以狗庇屬員降回知。尋改蘇州府。終以不獲上意。發台上。壬辰釋歸。回蘇。至揚州卒。

居官者。莫不畏殘暴奸邪之名。莫不生貪功慕祿之念。然此一念。卽患得患失也。雖忠厚者。亦漸入殘暴。正直者。亦漸變奸邪。其後也。破人身家而不顧。壞己廉恥而不恤。嗚呼。孰非此一念啓之哉。此無他。惟以義命二字藥之。孟子無義無命之言。余願終身敬佩矣。

運之通塞有定。毫不可強。古人所以有幸不幸之言。己丑余在奉任。一日堂審。捕頭捉四匪至。命卽帶訊。至到案。二人鎖項。二人散押。鎖者垂頭戰栗。散者神色自若。先問捕頭曰。奉命巡緝。適見田野車棚內有炊烟。趨之。四人亂竄。悉捕焉。二人搜有賊具。且臂刺。故鎖之。此二人雖無刺字。而其處同逃。故亦帶焉。命將散押者帶下。餘二人開鎖驗之。臂刺已刮去。查犯案在五年前。問其近作。無有也。嚴詰再四。止招小竊二。三件。更問與彼二人同夥乎。曰。求乞偶遇。共炊耳。素不識也。遂各責三十板。以枷釘之。出。帶散押一人至。詢其姓名里居。似信口應之者。且言失業乞食。勿爲匪也。細察口音少異。且詞色揚揚。心異曰。何其見捕而逃。見官而自若也。此必大滑矣。正異間。有南邑謝文當堂投遞。拆之。則走脫大夥盜首一名。夥盜一

名求協緝也。余命將此人押過宅內客房。立傳皂頭軍役八人。肅立階下。並着看夾棍兩付。各挽袖以待。後帶彼一人入。余據案怒立。大喝曰。爾是南匯某案盜首某也。乃敢匿此累我乎。彼已盡招。爾一語少差。立死此矣。遂命夾起。甫取棧。曰。乞暫饒命。我非盜首。實夥盜某。彼乃首也。命細供之。正關案焉。乃復喚前一人至。對質之。無遁情。遂命畫招。嚴禁通詳。久之。凡拏獲鄰境盜犯者。陸續隕五六輩。余竟無聞也。何莫非定數乎。

松江一郡。素稱盜藪。而奉南上三邑爲甚。以其內聯黃浦。外通大洋也。余任奉。訪其窟則網船焉。稽船之隸本邑者千餘隻。歲納漁課若干。去之不得也。余爲之編戶口。一船爲戶。十船爲甲。以長厚一人統之。曰漁甲。十甲選一人總之。曰漁總。各船編烙印號。並給一照。上添其家口年貌姓名。如鄉堡門牌式。于邑之幹河立四塢。各距十數里。卽總甲分撥。每塢若干甲。日捕漁。夜歸塢。而以大鍊截其塢口。飭保正營兵兼管之。不時委巡司捕廳查勘。余亦按時點驗。方自謂法密。乃盜竊之報無虛日。縱嚴比捕役。十不破三。且未有獲網船賊者。余日夜思維無善策。一日。巡司盧捕廳鄭來謁。遂留飯。屏左右。余曰。二公亦有聞乎。我邑有梁山泊矣。民不安枕。將奈之何。二人見余情詞急切。乃曰。公欲除大害。我輩敢不效命。但事非易舉。恐難濟耳。余曰。若何。盧曰。鄭某初來。余七年矣。請爲公詳言之。網船之隸我邑者。僅千餘隻耳。合郡計不下萬數。然其聯絡如一家。各邑有頭目二三。我邑則某某也。居陸地家頗豐。船之男女皆益。且各嫻武藝。

視官刑如無物焉。自卑衙弓兵及縣捕兵刑書。遞至司院吏役。俱有陋規計。每年費三千餘金。每船止出二三錢足矣。其做活。皆易地以盜之。越境以變之。卒使無真贓實犯焉。且緝之則拒捕。訊后則上控。歷任爲此。莫不無益而有損也。明公其熟計之。余曰。天下事無不可爲者。二公其努力乎。皆曰諾。遂辭出。余思無贓不可以破案。一日傳老當役四人。與之酒而命曰。網船爲害。汝等知否。曰然。余曰。盜固在船。贓必寄陸。汝等爲我緝之。四役曰。此捕役事耳。余曰。正恐捕役知也。終遂巡莫敢應。余曰。毋畏。有我在。又曰。不保其贓之必寄也。余曰。傳查之票已出。彼知親查。有贓必寄。汝等沿岸緝之可得也。四役領諭而出。先是出傳票時。召刑書抽役至案書曰。此非換照時。恐不能悉到。余曰。爾以爲換照乎。我實搜贓耳。敢有不到。該捕青草。蓋竟使其遞信寄贓也。至期。逢棉雲集。幾攬遍臺塢喧噪之聲徹城內。亦可懼也。余坐定執冊。命刑書立左。捕頭立右。揀別班頭役十人。照單查驗。人照不符者。押過一邊盡搜其有無異物。其舊曾犯案者。捕役高聲喝報。另押一邊點至終日無他異。查押過舊犯七人。刺字盡刮去。帶至署並命各船無得走散。次早而四役至。得贓物兩船。並拘到受寄主人某。盤查箱櫃十數件。他物無算。逐一問某件爲某記。記其名。啓視之。衣裳靴襪悉綾緞紗羅。並多字畫古玩。無一爲漁家物。命庫書開冊封寄。並令刑書細開服色。及諸物名象。粘示召認。其又器字畫。張設頭門外。諭認者隨時給領縱諱報不問也。遂將寄贓者一一拘到。隔別研訊。至三日夜。無一具供者。雖諸刑備用自若也。隨有失主二人。一認茶盤二塊。一認白米四

袋面。質始招焉。以後絕無一人來者。悉收之禁。屢爲提究。如故也。過半月。而府文下矣。責其禁錮無罪。某某。卽此輩名。且提承回話。余曰。吁。此盜賊之根也。吾無以對百姓矣。出其因而以重枷釘。限滿卸枷。責四十大板。復枷焉。久之。竟無認贖者。有紳士密告曰。其頭目皆已賠償失主。失主利其財而懼其禍。故無認之者。且各上房已行通矣。然上雖督責。余終不釋。枷至年餘。余以鑄級解任。后任至。羣釋之。及領咨赴部。紳士送之曰。聞網船賊思報。公密防之。余曰。天有日矣。何虞焉。卒不爲害。

嘉定出竹器。皆專門名家。凡屏几文器。莫不精工。余嘗署縣丞印。多見之。但值甚昂。不能得。又在邑侯李公席上。見一馬極舊。以竹根鏤之。高可三寸。蜃几上。神駿如生。鬃尾絲絲畢見。問價則五十金也。更有挂屏一具。寬二尺餘。高三尺五寸。內外兩層。皆竹爲之。外層薄如紙。鏤萬字錦。玲瓏透剔。毫無補接痕。內層離二三分。刻唐律一首。點畫刀法。秀勁無匹。真絕技也。

蘇城有賣鐵挂屏者。大小不一。以木板爲白紙糊面。外則花卉昆蟲。形神俱似。遠視疑墨筆畫。近按則鐵也。質細如泥。光如漆。出自丹徒。止一家不他授也。相傳某外遊。見一人如落魄狀。邀之家。供養無倦。久之。其人將辭去。曰。感爾厚意。無以謝也。某善鐵匠。授子可致富。毋他傳。遂具爐匣。不用錘剪。出紅冶。以手捻之。如意而成。某得其技。遂專門焉。殆神授也。余見之屢矣。

揚州新製挂瓶。亦奇技也。其形象種種。幾于百數。皆仿古今尊壘瓶盃等式。古色者。有如臘。如茶。如褐。如

青蛙如燒斑。陸離光怪。嫩色者則吹紅吹青。以及黃白藍綠。無所不備。下有座如泥漆楠木狀。貯水插花挂壁。莫不以爲銅磁。卽把玩不疑也。實則鉛爲之。人工奪天巧矣。

玉之貴也。自古爲然。蓋取以比德。佩以視履耳。近今仕途珍之。余見寅僚中。身帶而手弄者。十人九有。飲食不去也。良以玉得汗氣則光彩始出。將以作面貲也。余在官四五年。力不能辦。且不欲焉。

天下飲食衣服之侈。未有如蘇州者。衣料出自蘇城。其值少低于他省。猶不足異。至食物則莫貴于此矣。而士民會客。一席動值三四金。甚有至七八金者。官席無論也。此亦太平日久所至。然而暴殄天物矣。

唐句云。一騎紅塵妃子笑。無人知是荔枝來。作者有隱諷焉。夫以貴爲天子。卽馳驛荐新。亦無足異。特以供妃子有議耳。然蘇地貴者皆得。余嘗在糧巡兩道署。食數次。其實如冰雪。鮮嫩甘香。沁人心神。不可以言語狀。余心計曰。此無怪貴妃之笑。且無怪紅塵之載道矣。

江南人喜標榜。于食物亦然。如江寧之板鴨。上海之風雞。吳江之糟黃雀。昭文之薰豆腐。南匯之沙裏鉤。(小蟹也。)松江之四腮鱸。奉賢之雙鳳瓜。上海之水蜜桃。婁門之大鴨。無錫之饅頭。此皆以地名者。若陸高漸之燒蹄。王回子之薰鴨。孫純陽之點心小菜。此又以人名者。士民爭購。主人應接不暇。余皆領之。不過少加尋常。而其值則倍矣。余竊謂物之價廉而味美者。曰新筍。秋菱。雪藕。楊梅。枇杷。鱖魚之數者。惟鱖魚價少昂。然皆他處所不能得者。余至不忘焉。

城隍廟神。郡縣各一。此亦如人間守土不可有二也。而江南鄉鎮處處有之。故春秋郊社時紛紜遍野。更以此角勝負。而鼓吹儀仗之盛。日益侈。且爭界爭道。每每殭疊生事。官亦莫之禁也。更有奇者。余向署嘉定丞。居倅邑廟。見內之塑像莫數。精巧如活。皆飾以吏役裝。且塑工日日不歇。異而問之。則某某人。蓋皆捨身了愿。照其形以塑者。遊至寢宮。見本神之外。夫人侍妾。儼然具在。而小環嫗婢滿焉。各報巾櫛盤盂等器。一一像生。實皆某某家妻女。捨身服役也。至牀榻帳幔被褥几杖之屬。精緻非常。且時有告狀人。舉擊鼓焚香。跪神前而訴。並於春秋設櫃出票。徵收四鄉香錢。如縣署之徵錢糧狀。故廟門終日如市。卽紳士之家。亦有與焉。吳人好鬼。其信然乎。

余于蘇州藩司署。見一犬特異。高不盈尺。而頭嘴極大。身粗六七圍。徧鞞紋。其形色與虎無少異。惟爪尾略差耳。亦殊種也。

有蘇遄者。住虎邱山塘。余嘗以遊山坐觀之。泥細如麵。顏色淺深不一。有求像者。照面色取一丸泥。手弄之。談笑自若。如不介意。少焉而像成矣。出視之。卽其人也。其有皺文疤瘡。桑子者。毫無差。惟鬚髮另着焉。晒乾以衣冠靴襪裝之。衣之單夾棉皮。各色悉備。至綾緞紗羅布紵。隨人意也。其值之低昂視此。入一楠木匣。或坐榻。或椅。几。方几條案畢設焉。壁上懸小字畫。案列瓶爐文具。概屬眞物。外以鐵線紗罩之。細觀鬚眉如活。形神逼肖。卽畫手傳神。無以過也。眞絕技矣。

近日屬員餽送上司物。在外則諱其名。至內則貶其值。余候補一日上院。見廊下數大盒。內皆紙包。排擠無縫。約五六十包。盡粘紅簽。上書吉祥菜三字。諸僚友異其名。竊拆視。皆雪燕也。異日長洲公招飲。席上有燕菜一色。元和黃公曰。何必費此吉祥菜也。一座大笑。

丁亥。予初任昭文。一日視囚。內有一極口叫冤者。提訊之。王姓。乃被告姦拐犯也。查案。則以馬氏有女。年十八。忽逸失。王爲馬氏房佃。住比鄰。遂指控焉。前任以女薶自王屋搜出。卽具獄。定流罪。余審其人。形容端正。語氣直切。意其冤而思出之。乃馬氏居近署前。不呼而至。至則放言巧辯。且以定案証余。余取其誣告甘狀逐之。復問王。氏女在家情形。知女爲氏之養女。氏以放印錢致富。其債悉令女討之。不如數。則責罵不已。至女薶。則其未逸前。倩王妻補綴者。實不知其何以失也。余聞有追捕某。能事也。密喚至。囑其事。予以長批。且恤其家而厚其賞。限一月緝焉。捕許之。未十日而舉獲矣。女至訊之。已嫁徽商某。七月而懷孕矣。自言在家時。不得于其母。如王言。某日以討負未得。過相識王。氏商之。遂攜逃至蘇。尋牙保。嫁徽商焉。王佃實不知也。且言其夫婦甚相得。蓋懼離也。余傳馬氏到案。悉白其情。釋王囚。治牙保罪。命徽商備聘成禮。而馬氏力執斷離。余據其誣告甘結。將執其子于法。氏始俯首矣。隨令伊夫妻當堂拜氏。而後納幣其門焉。

余在昭。有朱姓。後河浮屍一具。近村譚姓。認爲己姪。遂具控。朱某謀害。急馳相之。其屍仰浮。果死後入水。

其家人止一母。已七十矣。鄰居二一獨夫。一有婦而喬野端正。朱某已逃。余徘徊久之。迤西見竹林一區。約隔里許。隱約有廬舍焉。徐步至。則前后兩家。前者夫婦二人。后一家門牕扇鎖。如無居人。問之。則晨起往田間。謝姓。夫妻二子一媳。共五口。媳則新婚也。余心計曰。致死者必此家矣。蓋時方六月。無事耕耘。且未有一家盡出者。況有一新婦乎。且吳民好動。一官下鄉。遠近聚觀。豈住居伊邇。而獨勤業如是耶。余記屍回署。密留人訪之。皆以爲朱某害也。比獲朱。而謝始歸家焉。至研訊朱某。實有角口情由。鄰人卽勸去。初不知何以死也。問何爲出金私和。又何以逃。曰。愚民畏法耳。于是嚴詰保正。得私和實情。朱出金十二兩。謝某出六兩。他鄉不與焉。遂將謝氏先後拘到。始詢其父。驟以殺人詰之。其情詞惶惶。不知所措。而辟子既焉。因反覆急究。則招其姦。而諱其死。及伊子。挺然不屈也。先是差人尋死者衣。並囑其子謝氏後河。扞之。至則果得。按之無血跡。又差拘謝氏婦。且戒差伺其動靜。比差至。而謝氏老婦匿牀下。搜拘至。形容粗醜。問年則五十歲。而死者才十八歲也。乃一訊而得焉。供與譚氏子自十五同姦。已四年矣。其少子十七歲。每恨之。未有間。是日譚與朱角口後。逸至伊家。其夫見而逐之。譚匿房后竹林。至夜開牕迎入。及解衣行事。房門忘閉。少子持棒突入。擊首仆地。連擊腰脅遂死。家人欲滅跡。因其與朱日間口角。故置其后河焉。引伊子質之。亦莫之諱。遂起其棒。上命常熟令會檢。傷痕悉符。卽具獄。釋朱。謝氏子亦以夤夜入宅。

律免焉。

余補奉邑。住省候部覆。寓近申衙前。一日同友人入市肆。買一楠木香几。市議價。其店主審視余。請曰。公非常太爺乎。友曰是也。其人倉皇致敬。邀內奉茶。甫入。卽跪而謝曰。小人周德遠也。前蒙破恩。斷歸妻子。終日焚香頂祝矣。遂呼其妻出。叩余急止之。及細詢。已生子六月矣。臨行舉香几爲壽。余笑而却焉。

余初蒞奉。有報命案者。詞稱有女名某。幼賣某爲婢。久之欲爲妾。女不從。鞭笞數次。伊往視。隔不容見。女潛出哭訴而別。繼而主使報病。往視之。又不容見。居無何而死矣。非謀殺卽威逼也。余急趨驗。值大風雨。終日始至。甫坐定。命舁屍。役曰。案側是也。見一小波羅布單覆焉。啓視。臭氣薰人。出之。身才三尺高。問年十一歲也。問死患痢疾也。余適大怒。而屍親逸矣。命其主卽斂之。有老嫗年八十。哭出人叢中。牽余衣。不得乘輿。詢之。則死者之外祖母也。禁之不得。立責保正。命搜獲嫗子于稠人之中。重杖三十。而老嫗亦杳不知其所之矣。奉民之刁健如此。可以識風俗乎。

有周某者。素無賴也。曾以詐財未遂。恨其鄉人某。值春社。余郊行。忽一婦人號哭喊冤。踉蹌而至。跪輿前。面血淋漓。衣衫盡碎。問其情。稱村人某。瞞其夫出。突入行姦。彼堅執不允。因碎其衣而捶其首。聞官來始遁去。余下輿細視。衣無揉搓形。是竟扯者。而血四圍順下。且色紫而滯。按其頂微腫而無破碎痕。心知其詐。給曰。至爾家差拘之。婦人前導。不數武至其門。余命梘坐。先令二役下屋後竹林搜之。毋得走脫。匿人。